

## ADYAYA I

### PURWAKA

#### 1.1 Dadalan Pikobet

Ketahnyane malajah kabaosang pinaka parilaksana sane ngawinang wenten pauwahan parilaksana ring angga. Madasar antuk dahat mawigunanyane ngrereh kawidyan punika, paplajahan pinaka usaha sane prasida kamargiang olih guru, sane prasida karesepang olih para sisia turmaning prasida mawinan paripolah sisia magentos dados becik (Darsono, 2000: 24). Yening kauratiang malih, paplajahan prasida karesepang pastika wenten paiketan sane becik pantaraning guru miwah sisia, sane ngutamayang indik tata titi paplajahan majeng ring sisia, miwah wenten pangajahan olih guru (Suryosubroto, 1997: 34). Sajabaning punika, wenten tata titi paplajahan inggih punika sakadi sarana miwah tata titi paplajahan. Sarana miwah sane kalaksanayang majeng sisia, taler sarana ri kala malajah becik kawigunayang. Konsep sakadi puniki prasida ngiusin unteng paplajahan sane ngutamayang majeng *keaktifan* sisia saha tata titi paplajahan sane prasida nyaritayang indik tetujon paplajahan sane sampun kaanggen mangda prasida kapolihang olih sisia.

Pamlajahan sane kalaksanayang ring sekolah SMAN 1 Kintamani sampun nganutin *kurikulum Merdeka Belajar*. Ring kurikulum Merdeka madue teges *konsep kamandirian* teler *kamerdekaan* majeng *pendidikan* sane wenten ring Indonesia antuk nentuang tata titi sane becik dados kawigunayang ri kala tata titi

malajah miwah ngajahin (Afida, 2021). Parikrama *kurikulum merdeka* antuk ngabecikang paplajahan sane *fokus* majeng ring *kacakapan fondasional*, sakadi *literasi, numerasi, miwah karakter*. Ring *kurikulum merdeka* kawagedan *literasi miwah numerasi* pinaka sorohan saking *Standar Kompetensi lulusan* sane kaplajahin antuk pamargi sane *kontekstual* ring *Kurikulum Merdeka*. Madasar antuk kurikulum punika, sisia kaicen kabebasan antuk mapineh lan ngrereh pangawit paplajahan ring sumber sane tiosan, mangda dados ngrereh kaweruhan lan ngpah pikobet sane kawentenang. *Kurikulum* puniki kaaptiang prasida ngicenin sisia miwah guru ngresepang pamlajahan sane nenten kaiket antuk genah lan galah.

Kurikulum Merdeka Belajar ngicenin kawenangan malajah majeng para sisia sane *merdeka*. Nika mawinan guru mangda nyiagayang strategi paplajahan sajeroning ngamargiang parikrama paplajahan ring sekolah. Ring *Kurikulum Merdeka* puniki, wenten strategi paplajahan sane berbasis proyek. Sisia katunas mangda nganutin materi sane sampun kaplajahin saking *proyek* utawi *studi kasus*. Proyek puniki kawastanin *Proyek Penguatan Profil Pelajar Pancasila (P5)*. Dadosnyane *proyek* niki madue *sifat lintas* mata paplajahan sane kaintegrasi. Tata titi paplajahan sane berbasis proyek niki kalaksanayang sisia saking observasi pikobet selanturnyane mangda prasida ngicenin solusi real saking pikobet sane kapolihang (Dikdasmen, 2022). SMAN 1 Kintamani sampun ngamargiang parikrama *literasi sekolah* pinaka *program Gerakan Literasi Sekolah (GSL)*. Gerakan literasi ring sekolah silih sinunggil program sane penting kalaksanayang ring bidang pendidikan, mawinan program niki dados panglimbak kawagedan sisia ri kala mirengang, mabaos, ngawacen miwah nyurat. Kawagedan literasi sisia

makaitan majeng tuntunan kawagedan ngawacen sane mapaiketan ring kawagedan ngresapang, nyliksik, miwah ngwigunayang.

Wenten tetujon *literasi* sakadi; kapertama prasida nincapang kaweruhan antuk ngwacen makudang-kudang gatra sane mawiguna; kaping kalih prasida nincapang pangresep jadmaj ring ngamolihang pamicutet saking gatra sane kawacen; kaping tiga, nincapang kawagedan kramane miwah ngicenin penilaian sane kritis ring silih sinunggil karya tulis. Sajabaning punika wenten kawigunan saking literasi sakadi; kapertama, nincapang kawentenan kruna (kosa kata); kaping kalih ngamolihang makudang-kudang kawidyan miwah gatra sane anyar; kaping tiga, prasida nincapang kawagedan ri kala ngmijilang gatra; kaping pat, nincapang kawagedan ring nyliksik miwah pikayunan para janane; kaping untat nincapang kawagedan kramane ri kala ngrangkepin kruna sane madue artos.

Ring SMAN 1 Kintamani, gerakan literasi punika mapaiketan sareng mabeaosan ring arep anak makeh. Sakadi sausan sisia ngawacen daging saking buku sane sampun kawacen, sisia kaicenin galah antuk nelatarang indik napi sane sampun kawacen iwawu majeng ring arep anak makeh. Literasi mabuat pisan majeng sisia mawinan kawagedan literasi prasida ngicenin iusan ring hasil paplajahan. Kawagedan literasi sane becik prasida ngwantu sisia ri kala ngresapang teks bebaosan, suratan, miwah gambar. Kawagedan literasi patut kadruenang olih angga pinaka sarat antuk mapupul sareng krama, miwah kawenangan dasar jadmaj indik paplajahan rikala maurip. Silih sinunggil literasi sane patut kadruenang punika literasi ngwacen miwah nyurat. Kawagedan ngwacen dados sarat sane patut

kadruenang olih sisia ring *jenjang pendidikan* mawinan pangwacen sane becik prasida ngresepang informasi lan gagasan sane wenten ring wacana.

Ri kala nglaksanayang gerakan literasi, wenten kapiambeng inggih punika sisia durung prasida nglaksanayang utawi nyarengin parikrama literasi, sisia durung prasida nglaksanayang literasi ngraga, nenten wenten paplajahan sane menarik, kirangnyane jinah anggen ngamargiang parikrama literasi ring sekolah. Dadosnyane ide-ide sane wenten durung prasida kaparipurnayang antuk parikrama literasi. Punika nenten samian prasida kamargiang, sakadi antuk jinah jurnal ngawacen sisia, taler akeh sisia yening kapiayang antuk nelatarang sakadi lisan daging sasuratan ring buku sane kawacen kacingak wantah nglaksanayang pituduh punika sareng nguningayang ring siki lengkara manten, dadosnyane nyinahang parikrama literasi sane kamargiang durung efektif.

Kawentenang makudang-kudang pikobet indik parikrama literasi ring SMAN 1 Kintamani, wenten inovasi silih sinunggilnyane nyurat komik mabasa bali. Malarapan antuk nyurat komik Bali nincapang kewagedan literasi sisia. Komik mabasa Bali puniki dados silih sinunggil saking makudang-kudang ragam tradisi lisan. Komik mabasa Bali inggih punika carita sane madaging gambar nganggen basa Bali. Malarapan antuk makudang-kudang ilustrasi miwah basa ibu sane kaanggen madue tetujon mangda dangan para yowanane sajeroning ngresepang basa Bali santukan kadagingin antuk gegambaran.

Nyurat komik Bali prasida ngawantu sisia ri kala mabligbagan sareng tempekannyane. Komik punika mawiguna anggen nyangkepin parikrama paplajahan sakadi materi ring silih sinunggil daging sesuratan. Panyangkep inggih

punika dados panyaluran konsep, silih sinunggil konsep abstrak mangda prasida polih dangan kawacen olih pangwacen. Komik punika kadagingin antuk rupa sane menarik, miwah kasusun antuk alur cerita sane dangan karesepang. Nganggen komik, paplajahan punika dangan kaplajahin mawinan kadagingin antuk carita miwah gambar sane becik. *Aspek afektif* miwah pabesen indik tata susila punika jagi kaanggen nglimbakang tata titi paplajahan nganggen komik, sakadi nganggen karakter tokoh sane wenten ring komik. Manut saking paplajahan sastra komik kaangen media paplajahan sane efektif, kaaptiang komik dados sarana paplajahan sane dados kaanggen ring paplajahaan lan jenjang pendidikan sane lianan.

Malarapan antuk pikobet sane sampun katlatarang ring ajeng, prasida kauningayang kawentenan komik Bali dahat mabuat pisan kaangen parikrama literasi basa Bali sisia ring sekolah. Parikrama literasi basa Bali antuk nyurat komik Bali sisia X E SMAN 1 Kintamani puniki jagi nuntun pamargin guru mangda tetujon paplajahan punika prasida kapolihang taler prasida nincapang kawagedan sisia majeng parikrama literasi. Antuk punika dadosnyane panilik meled nglaksanayang tetilikan sane mamurda “Parikrama Literasi Basa Bali Antuk Nyurat Komik Bali Sisia X E SMAN 1 Kintamani”.

## 1.2 Ngrereh Pikobet

Sajeroning tetilikan puniki, panilik ngrereh makudang-kudang pikobet sane mapaiketan sareng dadalan pikobet sane sampun kabahbahang ring ajeng. Pikobet sane sampun karereh punika mapaiketan sareng parikrama literasi Basa Bali malarapan



antuk nyurat komik Bali anggen nincapang kawagedan sisia kelas X E SMAN 1 Kintamani. Pikobet sane sampun karereh minakadi: 1). Sisia kakirangan antuk galah ri kala polih paplajahan Bahasa Bali, 2). Durung wenten paplajahan sane nganggen komik, 3). Semangat sisia ri kala malajah basa Bali punika kari rendah utawi kirang, 4). Ri kala guru nyobiahang indik materi para sisia durung ngresep sareng bebaosan Basa Bali nika mawinan guru punika mangda nganggen kalih basa mangda sisia ngresepang indik materi, 5) Ri kala nglaksanayang literasi kari kirangan wacana basa Bali, 6) Sisia nenten semangat ri kala nyarengin parikrama literasi.

### 1.3 Ngwatesin Pikobet

Kawentenan watesan ri sajeroning tetilikan puniki nenten lian kadasarin antuk kahanan kelas taler sane kabuatang olih para sisia. Manut pikobet-pikobet ring ajeng, panilik nyutetang jagi nelebin inggih punika; 1). Panglimbak literasi Basa Bali nganggen nyurat komik Basa Bali, 2). Kawentenan nyurat komik Bali nincapang kawagedan sisia indik krana Basa Bali. 3). Ri kala nyurat komik punika prasida nglimbakang *kreatifitas* sisia.

### 1.4 Bantang Pikobet

Malarapan antuk dadalan pikobet sane sampun kapolihang, bantang pikobet saking tetilikan puniki inggih punika sakadi ring sor:

- 1). Sapunapi parikrama literasi Basa Bali antuk nyurat komik Bali ring sisia X E

SMAN 1 Kintamani?

- 2). Sapunapi kawentenan nyurat komik Bali prasida nincapang kawagedan sisia ring kosa kata Basa Bali sisia X E SMAN 1 Kintamani?
- 3). Sapunapi panampen sisia indik parikrama Literasi Basa Bali antuk nyurat Komik Bali sisia X E SMAN 1 Kintamani?

### 1.5 Tetujon Tetilikan

Malarapan antuk bantang pikobet sane sampun katelatarang ring ajeng, tetujon saking tetilikan puniki inggih punika:

- 1). Mangda prasida uning parikrama literasi Basa Bali antuk nyurat komik Bali sisia X E SMAN 1 Kintamani
- 2). Mangda uning kawentenan nyurat komik Bali prasida nincapang kawagedan sisia ring kosa kata Basa Bali X E SMAN 1 Kintamani
- 3). Mangda uning panampen sisia indik parikrama Literasi Basa Bali antuk nyurat Komik Bali sisia X E SMAN 1 Kintamani

### 1.6 Kawigunan Tetilikan

Sajeroning tetilikan pastika maduwe kawigunan sane kaaptiang. Ring tetilikan sane mamurda “Parikrama Literasi Basa Bali antuk Nyurat Komik Bali Sisia X E SMAN 1 Kintamani” madue kawigunan sane kakepah dados kalih soroh, inggih punika kawigunan pamucuk miwah kawigunan panglimbak. Kawigunan punika jagi kawedarang ring sor.

## 1. Kawigunan Pamuncuk

Sajeroning tetilikan puniki, kawigunan saking pikolih tetilikan kaaptiang mangda prasida mawiguna sajeroning panglimbak kaweruhan ring widia pangajah-ajah (teori) indik literasi Basa Bali antuk nyurat komik Bali.

## 2. Kawigunan Panglimbak

Sajeroning tetilikan puniki, kawigunan panglimbak prasida macihna ri kala sepat siku-siku sane kaanggen jagi katelebang. Kawigunan panglimbak ring tetilikan puniki inggih punika:

### a. Majeng ring sisia

Kawigunan tetilikan puniki kaaptiang mangda prasida anggen paweweh aji (ilmu pengetahuan) mangda sisia uning tur ngresepang indik literasi Basa Bali antuk nyurat komik Bali. Taler mangda prasida kaanggen nincapang kawagedan sisia sajeroning literasi Basa Bali antuk nyurat komik Bali.

### b. Majeng ring guru Basa Bali

Kawigunan tetilikan puniki kaaptiang mangda prasida ngawantu guru ring paplajahan kasusastraan Bali modern sane ngwigunayang komik Bali anggen nincapang kawagedan lan pangresep sisia sajeroning nyurat komik Bali. Taler, guru mangda prasida uning kawagedan sisia, kaiwangan-kaiwangan, miwah pikobet-pikobet sane kapanggih ri kala nyurat komik Bali.



c. Majeng ring panilik selanturnyane

Kawigunan tetilikan puniki kaaptiang mangda prasida kanggen sepat siku-siku utawi sesuluh ring sajeroning tetilikan selanturnyane sane ngenenin parikrama literasi Basa Bali antuk nyurat komik Bali.

d. Majeng ring panilik

Kawigunan tetilikan puniki kaaptiang mangda prasida kanggen dasar majeng ring panilik ri kala benjang pungkuran ngajahin ring sekolah-sekolah nganggen *media* utawi *aplikasi* pamalajahan sane prasida nguningayang kawentenan asil sane anyar



